

Den serio y den joke, Premier Oduber a emiti su opinion tocante poesia di Señora Wong

"E autora tin poesianan mucho mas bunita...!"

ORANJESTAD (AAN)-- Manera ta conoci pueblo di Aruba ta usa su sentido di humor cu basta picardia, y e expresion: "placa, placa, placa...", a bira parti di comentario, joke, y chansa riba caya y entre diferente gruponan e dos dianan ultimo aki.

Señora Filomena Wong, aunque a capta cierto critica cu su poesia, como parti di e programa dedica na e Pareha Real durante e actividad riba Plaza Betico Croes, a motiva un "toque di humor", di cual miembronan di prensa no a keda afo, pero tampoco gobierno a scapa.

Por nota esey ora cu Prome Minister a emiti su opinion al respecto, ora cu miembronan di prensa a trece e punto dilanti, ya cu practicamente tur medio a haya reaccion di publico.

"E señora tin hopi mas poesia hopi mas bunita cu esun cu a worde declama e anochi ey. Segun mi e ta un eror di no a screen prome kico lo ser bisa, pasobra bo por interpreta e manera cu a ser treci, na diferente forma, manera boso a tende reaccion di henter comunidad", Minister Presidente a bisa.

Minister Presidente no por a keda sin haci joke. Tur hende sa cu e tin su parti hopi gracioso cune den su comentarionan, y riba e tema aki el a conta cu e mes como espectador, ora el a tende asina hopi e palabra "placa", na dado

momento el a corda y bira wak su Colega señor Nilo Swaen, ya cu mirando cu gobierno di Aruba tin hopi problema (financiero) el a pensa "cu kizas por resolve nan cu poesia".

El a agrega cu el a puntra su mes si e poesia ey lo tin di haber cu e tantísimo casonan den Corte y debenan cu gobierno tin, y cu kizas lo sona positivo cu "placa, placa, placa" lo resolve nos problemanan...

Pero lagando joke un banda, Prome Minister expresa cu e poesia no tabata na su lugar, y mas ainda si tene cuenta cu señora Wong tin hopi poesia masha bunita mes.

Kizas si di adelanta nan lo tabata sa e texto nan por a kies pa otro poesia, segun e minister.

Pero e anochi tabata hopi bunita y multifacetico den e sentido di diferente forma di nos cultura cu a ser presenta,

tanto door di hubentud como di nos adultonan, coronan, etc., pues un tremendo anochi, cu algo asina tog por a sosode ta normal. Ta keda si, na e comision, pa bay evalua un ke otro.

Minister Presidente a bisa cu tur esnan envolvi mester por saca culpa pa otro biaha tin poesianan mas bunita pa trece dilanti.

E vocero di Gobierno y miembro di e Comision Organizador, señor Ruben Trappenberg, a haya importante pa agrega cu e escritor invita originalmente y cu tabata den e programa na pa e parti di poesia tabata señora Belen Kock-Marchena, pero esaki tabata na Mei, cu pa motibonan conoci pa un y tur e bishita di Pareha Real a worde cancela.

E biaha aki señora Kock-Marchena no ta na Aruba, y na su lugar, señor Johnny Fingal cu tabata encarga cu e

estructura di e show na Plaza Betico Croes, a recomenda pa acerca señora Filomena Wong (ken en realidad ta tremendo den su trabao) kende a haya masha poco dia pa prepara su poesia.

E pakico no a haci escogencia di su poesianan ta mas bien pa señora Wong su salud, aunque e ta recuperando na un forma admirable aworaki.

Pero di e experiencia aki por siña na caminda, señor Trappenberg a comenta, acen tuando cu tin cosnan chiquito cu no a sali manera planea y cu no tabata den man di e Comision (por ehemplo na KvK), pasobra nan a encarga otronan confiando den nan experiencia, pero esaki ta un

les pa den un otro ocasion e Comision mes encarga cu tur cos.

Sinembargo, señor Trappenberg ta haya cu cosnan chiquito cu a bay fout no mester tapa e diescuatro actividadnan cu a bay tremendamente bon, loke ta refleha su mes den e hecho cu e Pareha Real mes no tabata tin palabranan negativo pa ningun cos, pero en general nan a elogia e programa.

Nan a keda impresionada tambe cu e nivel halto di prensa na Aruba, na momento cu a haci pregunta durante e conferencia di Prensa na Marinierskazerne, señor Trappenberg a remarca.

TELEFONNAN DI DIARIO
826747- FAX 828551